



Gajapathi Raju-i Goa Angh
tenangzükba agiogo

Meghalaya MP-i state
nung ILP benoktsü mepeshi

VOL. XXII ISSUE NO. 282 (ADOK 282) DIMAPUR

AMUNGNÜ (SUNDAY)

CHITENI (JULY) 27, 2025 ₹ 5.00

NPP-i arütsülen maparen balala inyaktsü ayongzüker

Dimapur, Chiteni/July 26 (TYO): Tawa Assam sorkari evection drive agiba ajanga il-legal immigrants tem nungboka aittsü süoki ia bilema National People's Party (NPP) Nagaland unit ajanga Nagaland sorkar dang tekeraba nung teka amteper telangzüba agütsütsü ayongzüker.

State home minister dangi tezüluba ka agütsüba nung, iba tensa ya state indang nütsüng yongsük aser sobaliba maitsü asoshi tebilemtsü tulu lir, ta NPP-i ashi.

Nagaland-Assam arütsü nung mela-mela aittettsüsa aliba, talisa arütsü nung aliba jila aser district tem nung nokdangtsü mera tajung magira item tesem nungi nungboka aittsü, ta ashi.

Junga verification magiba aser "surveillance mechanisms" peria alitsüla aser tensa maziüki yutsüra tesem balala nung nütsüng yongsük prokshia aliba nunga timtem ajurutsü, ta party ajanga tekumdangtsü ashi.

Iba yongji NPP ajanga tongtipang tesemtem aser arütsülen özüng alema aitba azüoktsü mechi ammag-sangwa metitemi mittsü asoshi patrol units tem yoknung ajungtsü ta ashi.

Assam Police aser central security forces den angatettepa interstate arütsü tajungba nung mittsü asoshi watchtowers aser checkpoints amenok nung ajungtsü ta ashi.

Illegal immigrants tem aitba azüoktsü asoshi Nagaland-i aitba aayanger ajunga biometric registration aser verification alitsüla. Urban colonies aser yimtsüngtem nung teti inspection drivers alitsüla, ta NPP

ajanga ashi.

Yimtsüng indang putu menden, colony ketdangtsür aser nüburtemi shilem agia state telungi tejak tasen aitba mittsü tongtipang ta ashi.

Parnoki nüburtem dang saksalema alitsü ayongzüker aser pei aliba tesem nung temlung melemettsüsa nisung senzüba lira ketdangtsür nemo sang agütsütsü ayongzüka liasü.

Anti-infiltration operations agitsü atema Home department kübok Special Task Force (STF) ka tentet nung ajungtsü ta ashi.

Tajungba nung mittsü aser tsüngsü aputsü atema Inner Line Permit (ILP) system tashi itshitsüla aser digitise asütsüla, ta ashi. Özüng alema state telungi aiter nem mapa inyakdaksüba nokdangtsü aser immigrants tem manidentsü mechi item inyakyim nung aibelenba nisung aser telok nem temerenshi tulu agütsütsü party-i ayongzüker.

Arütsü ketdangtsüba nung 'technological tools' nüngdaker. Arütsülen drones aser 'real-time monitoring systems' amshitsüla. Iba dak alia migrant tem aitba shidak mittsü aser jangjatsü asoshi state-level digital database yanglungung ajungtsü, ta ashi.

Tang tebilemtsü aliba mechi NPP ajanga state sorkar dang özüng amshiba agencies aser arütsülen aliba district ketdangtsürtem den tekeraba nung senden amentsüla aser entry point nung verification maparen tali tashi aittsü asoshi district ajunga nem totuyuba agütsütsüla, ta NPP Nagaland Unit ajangasa ashi.

Illegal immigrants tem aitba azüoktsü asoshi Nagaland-i aitba aayanger ajunga biometric registration aser verification alitsüla. Urban colonies aser yimtsüngtem nung teti inspection drivers alitsüla, ta NPP

Onoki Hamas telok bushitsü: Trump

Washington, Chiteni/July 26 (Agencies): Hamas-i Gaza nung rara anena alitsü memulungba ya Israel nunger pua alirtem chiokba sülen kechi asütsüar tsübobba ajanga lir, ta United States Tir Donald Trump-i ashi.

Trump-i Hokulbarnü White House nung iba o ashiba ajanga US aser Israel nati teti asoshi rara tembangtsü guarantee agütsütsü renema mali saka Israel nunger pua alirtem Gaza nungi anir arutsü asoshi khen atema rara anena atatsü ang tebilemba lir ama ajiteter.

"Hostages ishika dang anünga lir, aser hostages tatembangba anir aruba sülen kechi asüjar parnoki meteta lir. Aser iba yongji parnoki

tezüngzüktep ka meyangluner," ta US tiri osangbener dang ashi.

"Hamas-i tezüngzüktep meyangluner. Parnoki süner ama ni bilemer, aser aji kangasa majung," ta pai ashi.

Yimjung ken o jembiba nung Washington shilem agiba anener, ta Brehostibarnü Trump indang Middle East envoy Steve Witkoff-i ashi aser Hamas dak ceasefire alitsü tejangraba mesayur ta ashi.

Taoba mapang Witkoff-ibo iba truce ya ajanga Gaza nung teti asoshi yimjung alitsü ta shia lir. Ajisüaka Israel ketdangtsür temi pua alirtem chiokba sülen Gaza nung maneni raratsü aser Palestine nunger ajunga agentsü sentong aliba aiben jembia arur.

Manipur tensa tajungba kumtar: Bhalla

Imphal, Chiteni/July 26 (Agencies): Sorkar, security forces aser civil society organisations tem amalitep akaba ajanga state nung akhi ama tesunep arutar, ta Manipur Governor Ajay Kumar Bhalla-i Honibarnü ashi.

Imphal nung 26 buba Kargil Vijay Diwas sentong ka nung jembidang Governor Bhalla-i state nung kin balala tsünga tang mepetmesü adoka aliba ajanga inyakyim balala nung kongshiba indang lemsatepa liasü.

"Azüdokshi mechi nisung takum aika samaogo, aser meyrirjang aika pei ki yutsür tesem balala nung prokshia lir. Ajisüaka sorkari iba mepetmesü bentettsü aser nüburtem nem tanaben tamang katetdaksütsü asoshi mera aika agiogo," ta pai ashi.

Tawa state police aser central armed forces lungjemer operations agiba mapang hadir aser injang-bomb ngutetba indang Governor-i lemsatepa liasü. Rakzükraktepba mapa inyakba

telungpur aser telungpur telok tem senotsü agi yariba cyber platforms amshirtem aika puogo, ta pai ashi.

Iba ama inyaksangshi azüoktsü asoshi Manipur Police-i Central Armed Police Forces (CAPFs), Assam Rifles aser Army den lungjemer anti-extortion cell aser confidential helpline tenzüker. Iba sentong ya özüng alema senotsü akhangba nungi nüburtem kumzüka ayutsü nükjidong nung tenzüker.

District balala aser talisa national highways tem nung chiyongtsü aser mozü ama tongtipang osettsüset tetsükdak makai abentsü mechi security checkpoints tem amenoka lir ta Governor Bhalla-i metetdaksü.

"Item ama agency balala meyokteper inyakba den nüburtemi shilem agiba ajanga telungpur tesendaktep tashi maitba kumdaksür, tashiyim amshia senotsü meshiba ajemer, aser tanaben kati ka den

angatettepa alitsü asoshi inyaker," ta pai ashi.

Internally displaced persons (IDPs) tem yaritsü asoshia maneni inyaktar. "Tesem balala nung prokshia aliba nüburtem nem teimla agütsütsü aser skills sayutsü asoshi rangloker inyaker. Voluntary resettlement aser ajak asoshi security agütsütsü asoshi Meitei, Kuki-Zo aser Naga kin tenüng nung civil society telok tem den maneni jembishinü sutar," ta Governor-i ashi.

Chief Minister N Biren Sing mapa nungi anena aser state assembly anenba sülen Manipur nung February 13, 2025 nungi President's Rule nung lir.

Manipur nung May 2023 nungi kin balala tsünga azüdokshia arur, talisa Imphal Valley nung Meitei kin aser hill districts nung Kuki kin tsünga. Iba mepetmesü nung nisung 260 dak tema takum samaogo aser nisung meyrirjang aika pei ki yutsür tesem balala nung jenoka lir.

JMF-i Ao oshi nung takok angurtem tushi



Jemtimenba Mollier Foundation-i tanü Ao Oshi Nung Alakteta Takok Angur Tushiba sentong agir kelen JMF pur aser senpet agizükertem külemi tangokba noksa nungji angur.

Mokokchung, Chiteni/July 26(TYO): Jemtimenba Mollier Foundation(JMF)-i tanü Ao Oshi Nung Alakteta Takok Angur Tushiba sentong ka tanü Ao Senden Kilem nung kaogo.

Tanu iba sentong nung sentong meraketsür Wb.Imtitongba Jamir Tatar, Tambuti Kosasanger Puso Ungma-i jembidang asen Aor oshiji tepang ajanga dang jembia belentepa aru aser itemji shiküp nung zülua ayu saka iba shiküpji azüi sür aoba agi sama saka tia kaa asen Aori o ka süli ken ka ano o ka süli ken ka ta aruba ajanga oshijibo mesamai tanu tashi jembia aru ta ashi..

Naga kin rongnung asenok Aor mezüng tenük lapok Naga nunger aika asenokia tenük lapoktsü saka tanüba oshi oben nung Tenimyia kin sülen lir. Asen Ao oshi renloka maoba timtemji asenok Aori Ao

azüngtsü aser zülutsü mejangrar aser ano talisa Aor kibongtem nung Ao oshi mejembir ibaji ajanga asen Ao oshi tanem tanemita sama-a aotsüta tesasaba olen ka ta Imtitongba -isa ashi.

Sentong Meraketsür-isa Ao kin tangar den liromedema otettsüsa oshi oben ajungkettsü mangdang tulu nung Jemtimenba aser par kibongi rongsen tulu tenla agüja iba Foundation tenzüker ajanga tanü Ao oshi tejakleni aoba nung shilem tulu agidagi, JMF-i Aor oshi oben tsütsü inyakba nung nübur ajaki nungitdita adenshia aliba nüburtem den lemsatep.

Sentong nung Tsüngrem lenisüba jazüka Rev.Lima Lemdur Pastor Union Church Fazl Ali College Campus-i sarasademer tenzüker JMF tarur pela agizükba aser JMF Ratet Wb.Aso Imsong JMF Züngsem

ajanga lemsatep, Dr.Nandira Changkija Principal Director (Rtd) H&F Welfare Govt. of Nagaland aser Prof.Rev.Rongsen tenati tepela o jembia, P.A.to DC Mkg.Wb.Imnüksüngba ajanga ajungmeso o jembia aser Ao oshi nung alakteta takok angurtem nem tetushi senpet.

Dr. Tali Imsong ajanga ketdangtsü agütsüba den Interlude CTC Aolijen telok ajanga Jemtimenba Mollier Foundation Naklu Ken tena sentong tobur jungdakja telok ajungmesoba den Alempang Baptist Arogo Pastor Ren Ngangnen Longkumer ajanga sarasadema sentong tembang.

Tanu iba sentong nung Ao Oshi Nung Alakteta Takok Angur tetushi senpet agizükertem yamai liasü.

HSLC -2025 küm asoshi Kr.Sunepbenla Imchen-i Ao Subject nung marks 98 ngutetba asoshi senpet agizük, HSSLC-2025 küm asoshi Sb.Lensen Ozüküm-i Ao Subject nung marks 98 ngutetba asoshi senpet agizük, Arangtet Tatidang Post Graduate Diploma Tenren-2025 nung Kr.Washinara Jamir-i marks 67 ngutetba asoshi senpet agizük, Arangtet Tatidang Diploma Tenren-2025 nung Kr.Akumtila Jamir-i marks 72 ngutetba asoshi senpet agizük aser Kr.Sensosangla Pongen-i Fazl Ali College nung BA. Ao Honors CGPA 7.81 ngutetba asoshi senpet agizüka liasü.

Longkhum Baptist Arogo nung Health Camp aka



Longkhum Baptist Arogo nung Lt. Dr.I. Longrizüing Trust-i sponsor süa Health Camp akatsü asoshi Rev. Akaba Pastor Longkhum Baptist Arogo aser Arogo nung tenzükertemi sarasademba mapang tangokba noksa.

Mokokchung, Chiteni/July

26(TYO): Longkhum Baptist Arogo-i Yisu Khrista osang tajung arur küm 125 ajungba Quasqui Centennial 2028 küm amongtsü asoshi Longkhum nüburtemi kanga dang sarasadema atadagi.

Iba Quasqui Centennial dak sendakba nung jili renemshiba sentong nung ajemdaker Health Camp ka Longkhum nung alir senior citizens-tem asoshi tanü Longkhum Baptist Arogo nung Lt. Dr. I. Longrizüing Trust-i sponsor süa senior citizen 136 Medical doctor temi temang anepalua

reprangogo.

Trust nung ketdangpur late.Dr.I. Longrizüing chirnur, semchisemnur aser anúkapangi Arogo dang pelaba den doctor aser nurses health camp nung bendanga yaritepa asoshi pelaba lemsatepda den ano maneni Dr.Marina Chief Medical Officer,Dr Mar (ortho specialist,Dr Lipokyang (eye specialist),Dr Zuchubeni (ENT specialist Ear,Nose , Throat),,Dr Sentila,Dr. Mar Walling aser ano Longkhum PHC nungi Asenla Nurse, . Kilemsungba BHW,Impangtula Vaccinator

aser Toshimongla Pharmacist nungertem danga Lt. Dr. I. Longrizüing Trust kangasa pelaba lemsatep.

Tanu iba Health Camp nung Tsüingremer lenisüba jazüka Rev. Akaba Pastor Longkhum Baptist Arogo aser Arogo nung tenzükertemi sarasademer tenzük. Tanu iba Health Camp senior citizen-tem agiba ya aruya aliba Quasqui Centennial nungji senior citizen-temia ajurutetdaksütsü mangdang nung akar aser ano küm nunga maneni nüburtem asoshi agiyonga aotsü sentong lir ta Lt. Dr. I. Longrizüing Trust ajanga lemsatep.

Assam Rifles-i sentong balala ayongzüka agi



Dimapur, Chiteni/July 26

(TYO): July 26 nü 26buba Kargil Vijay Diwas amungba anogo Assam Rifles-i Mon, Shamatore, Meluri aser Kiphire nung sentong balala ayongzüka agiogo.

Sentong nung National Cadet Corps nungi cadet tem, kaketshirtem, tesayurtem aser nüburtemi kanga jangrabangra shilem agiogo.

Sentong ya wako atsüketba sülen tenzük, koba Kargil War nung kanga tasü ita raraba sepaitem nem aküm tetushi agütsüba temaitsü ka liasü. Iba sülen drawing tetoktepba ka ayongzüka agi, kong lanurtemi parnok indang art ajanga parnoki Kargil Vijay Diwas koma angateter aji lemsatepa liasü. Tetoktepba ya arishi küm tatakzük balala tetoktepba ajak atema sempet agütsür

tembanga liasü.

Sentong nungsa Kargil War indang documentary ka sayu aser iba ajanga India Armed Forces-i tenla agütsüba indang nüburtemi tejangjaba angatet aser parnok tasü aitba aser pei mapa bendanga agüja inyakba atema tali tenüngsang agütsüogo.

Assam Rifles-isa, 26buba Kargil Vijay Diwas amungba anogo Kargil War nung tasü ita rarartem tem tetushi agüja Medziphema nung naro toktsüba sentong ka ayongzüka agiogo. Iba sentong den repsema School of Agricultural Sciences, Nagaland University, Medziphema nungi kaketshir 30 atema educational aser motivational tour ka ayongzüka kaja liasü.

Kaketshirtem nem Assam Rifles indang organisational

hierarchy aser puti otsü indang tangazükba agüja liasü. Maneni kaketshirtem ya Garrison kübok institutions tongtibangtem sema anier senzü aser sepaitem anogoshia inyakyim indang tangzükba agüja liasü.

Kasa mapang nung Assam Rifles-i ayongzüka Christian Mission High School, Phek, Nagaland nung July 26 nü Self Defence Training sessions ka ayongzüka katsüogo.

Iba sentong nung kaketshir 42-i shilem agia iba inyakyim ajanga ajangzükogo, koba kaketshirtem nem self-defence techniques angazükdaksütsü aser physical fitness ajungkettsü nükjidong nung ayongzüka liasü.

Iba sentong ajanga lanurtem nem tashi agütsütsü, fitness awareness ajungkettsü atema Assam Rifles bendanga agütsür aliba sayur.

Legal Services Clinic ka lapokogo

Kohima, Chiteni/July 26

(TYO): Judge Supreme Court of India & Executive Chairman, National Legal Services Justice Surya Kant-i Rajya Sainik Board, Directorate of Sainik Welfare & Resettlement, Nagaland Kohima nung Ex-servicemen tem atema National Legal Services Authority (NALSA) scheme, "Veer Parivar Sahayata Yojana" kübok Legal Services Clinic ka virtually tenzüksüogo.

Iba clinic ya linük ajunga nung NALSA Veer Parivar Sahayata Yojana - 2025' tenzükba anogo den denchitepogo, koba tang tinyakdak Defence Personnel, Ex-Servicemen aser parnok kinungertem nem angati legal services agütsütsü atema amenokba lir.

Iba scheme ya Department of Ex-Servicemen Welfare (DESW), Ministry of Defence kübok NALSA, Kendriya Sainik Board (KSB), Rajya Sainik Boards (RSBs), aser Zilla Sainik Boards (ZSBs) nunger longjemer tenzükogo.

State aser Union Territories ajunga nung Legal Services Clinics ya Srinagar, Jammu and Kashmir nungi Video Conference (VC) ajanga, Judge, Supreme Court of India & Executive Chairman, NALSA Justice Surya Kant-i tenzükja liasü.

Pai, state balala nungi chief justices tem, MoS Law and Justice, Lt Governor of Jammu and Kashmir, CM, J&K, GOC-in-C Northern Command aser Armed Forces, Paramilitary forces aser Legal Fraternity nungi ketdangsürtem matsüngdang iba clinic ya tenzükja liasü.

Legal Services balala

amenokba sülen tir o jembiba mapang Justice Surya Kant-i, sepaitem exservicemen aser parnok chirnurtem tali ajangzükdaksütsü atema lenmang tali bushitsü nüngdakba lemsatepa liasü.

Paisa, linük kümzüka toktsütsü atema nokdaka aliba sepaitem temzüing ozüing dak sendakba nung mepetmesü aliba parnok kija nem mebentetdaksütsü asoshi legal fraternity-i parnok shilem agütsüla ta ashi.

Scheme tasenba ya kinük nung aliba tesemtemi yoka aliba sepaitem shirnok okdaki maruteter mesüra kibong rongsen, domestic mangatetep mesüra ali ken o dak sendakba nung ken o tem machaayangteti ali parnok nem teyari agütsütsü asoshi lir. Iba inyakyim ajanga NALSA-i linük ajunga nung teyari agütsütsü.

Nagaland State Legal Services Authority (NSLSA) tawabangba kübok Kohima nung virtual senden nung Director Raja Sainik Board & PRO & Spokesperson Ministry of Defence, Manipur, Nagaland aser Southern Arunachal Pradesh, Lt Col Amit Shukla, NSLSA member Secretary, Neiko Akami, NJS, retired para military aser Panel lawyer temi shilem agia liasü.

RSB Nagaland nung Legal Services Clinic ya Nagaland State Legal Services Authority (NSLSA) den longjemer amenokogo, koba temzüing ozüing dak sendakba nung sepaitemi tetsükdaksü balala ajangshibatem bentettsütsü asoshi lir, kong pension, service benefits, kibong nung mangatetep, kiojen temeden aser tanga civil ken o tem densema lir.

Mokokchung coordination senden amen

Dimapur, Chiteni/July 26

(TYO): Mokokchung Deputy Commissioner Ajit Kumar Verma, IAS-i, ayongzüka July 25 nü Police, enforcement agencies aser lokti tentet balala den coordination senden ka menogo.

Assam nung sorkari ozüing alema ali atsünger alirtem aser kuli kaket tapet bena malirtem

aninba mapang item nisungtem ya district-i aitsü ana nung aliba süoki ia bilema, iba dak sendakba nung jenjang tapet agütsü asoshi lokti tentet balala den iba senden ayongzüka menogo.

Senden ya Deputy Commissioner, Mokokchung Conference Room nung mena liasü.

Consultative senden ayongzüka amen

Dimapur, Chiteni/July 26

(TYO): Phek jila nung tzü supply dak sendakba nung July 24 nü DC Phek indang office nung consultative senden ka menogo.

Senden ya Deputy Commissioner, Phek, Rhosietho Ngouri, NCS lenisüba nung agi, aser pai jila nung alirtemi teka amteper inyaka Phek jila nung tzü peria supply asütsü asoshi lenmang sadema lapoka aliba indang lemsatepa liasü.

Senden nung Phek Town Council mendenbuba, Phek

Town Head GB, Head DB Phek, Phek Town Public Forum tir, PHED, Phek Executive Engineer nungeria shilem agi aser tarutsü nung Phek jila tzü agi manüngdaksütsü atema parnok tebilemba lemsatepa liasü.

Senden nung Phek Town Public Forum den PHED department nungi ketdangsürtemi August 15 nü Laka awatsüing/ayong semdanga idak nungjaki tzü atsütsü atema asadangtsü telemteba agia liasü.



New Delhi, July 26, 2025: 26buba Kargil Vijay Diwas anogomong nung New Delhi nung aliba National War Memorial nung Kerala BJP Tir, Rajeev Chandrasekhar-i Kargil rara nung asür sepaitem nem akhüm agütsüdang tangokba noksa nung angur.

Gajapathi Raju-i Goa Angh tenangzükba agiogo

Panaji, July 26 (Agencies): Honibarnü Pusapati Ashok Gajapathi Raju-i Goa Angh tenangzükba agiogo; pai PS Sreedharan Pillai melenzüker. Ashok ya taoba mapang Civil Aviation Union Minister inyaka liasü.

Tenangzükba agiba sülen osangbenertem den jembidang Pusapati Ashok Gajapathi Raju-i sensotem dang state aintsü atema sorkar den

MP 17 nem Sansad Ratna Awards agütsü
New Delhi, Chiteni/July 26 (Agencies): Lok Sabha nung shilem kanga junga agiba atema MP 17 shimteta parnok nem Sansad Ratna awards agütsüogo.

MP tem rongnungji Supriya Sule (Nationalist Congress Party-Sharadchandra Pawar), Ravi Kishan (Bharatiya Janata Party), Nishikant Dubey (BJP) aser Arvind Sawant (Shiv Sena-Uddhav Balasaheb Thackeray) nunger lir.

Item awards rongnung Special Jury Awards pezü lir. Kümsük asem (term) tashi parliamentary democracy nung shilem kanga junga agiba atema MP pezü nem Special Awards ji agütsü. MP pezüji Bhartruhari Mahtab (BJP, Odisha), N K Premachandran (Revolutionary Socialist Party, Kerala), Supriya Sule (NCP-SP, Maharashtra) aser Shrirang Appa Barne (Shiv Sena, Maharashtra) nunger lir. 16buba Lok Sabha nungi tenzüka parnoki Parliament nung shilem junga agia arudar.

Awards angur tanüngba MP temji Smita Uday Wagh (BJP), Naresh Mhaske (Shiv Sena), Varsha Gaikwad (Congress), Medha Kulkarni (BJP), Praveen Patel (BJP), Bidyut Baran Mahato (BJP) aser Dilip Saikia (BJP) nunger lir.

Parliamentary committee category nung award anguba committee anaji- Standing Committee on Finance aser Standing Committee on Agriculture liasü.


amalitepa inyaktsüla, ta mepishi.

"Goa-i aruba atema ni pelar aser iba linük tenzüksü, talisa Goa nung nüburtem tenzüksü atema ni India temzüng kübok azüngashir. Ni iba mapa (Angh) yabo tang mezüng inyaktsü saka ni yimtenren nung mapang talangka inyaka aruogo. Ni ano aika angazüksü imlar," ta paisa metetdaksü.

Pusapati Ashok Gajapathi

Raju ya Telugu Desam Party (TDP) nung lenir taintem rongnung ka lir. Tang pa arrshi küm 74 lir aser TDP politburo nunga züngsem ka lir.

Ashok-i Vizianagaram assembly menden nungi kümsük (term) trokben tashi takok ngua liasü. Pa mezüngbo Janata Party nung liasü saka 1982 küm N.T. Rama Rao-i TDP tenzüka mapang nungi pa iba party nung aden.



July 26, 2025 nü New Delhi nung Palestine Ambassador to India, Abdallah M. Abu Shawesh-i interview ka nung jembidang tangokba noksa nung angur.

India-i Cambodia nung sensotem dang kümdanga alitsü metetdaksü

New Delhi, Chiteni/July 26 (Agencies): Tang Cambodia aser Thailand na tsüngda rara adoka aliba tensa nung ajemdaker Honibarnü Cambodia nung Indian Embassy-i yangji aliba India sensotem dang arrtsüleni maotsü tekümdangtsü metetdaksüogo.

Indian embassy-isa sensotem den helpline number aser email IDs lemsatepogo. "Tang Cambodia-Thailand arrtsülen rara adoka aliba nung ajemdaker India nungertem dang arrtsüleni maotsü tekümdangtsü metetdaksür. Rongdak nüngdak atema Embassy of India, Phnom Penh den +855 92881676 mesüra email cons.phnompenh@mea.gov.in ajanga tongtepratepang," ta Embassy-i metetdaksü.

Thailand nung aliba Indian embassy-ia India nungertem dang arrtsüleni maotsü tekümdangtsü metetdakja liasü.

Indian Embassy-i X ajanga, "Tang Thailand-Cambodia arrtsülen tensa majungba nung ajemdaker Thailand-i aoter India nungertem dang TAT Newsroom densema Thai ketdangsertem osang metetpelatsüla," ta metetdakja liasü. Brihostibarnü nungi tenzüka Cambodia aser Thailand na tsüngda raradar. Cambodia defence ministry-i ashiba agi, tang tashi nung iba rara nung sepai pongu aser civilian 8 süogo, iba dak alia nisung 71 yiruogo.

Rara tenzüka sülen Thailand nung nisung 58,000 jenshiogo aser Cambodia nunga nisung 23,000 dak tali jenshiogo.

Bihar nung ambulance telung nung tetsür ka tashiyim amshia raksatsü

New Delhi, July 26 (Agencies): Bihar kübok Gaya district nung Home Guard sepaitem shimba mapang nung arrshi küm 26 tetsür ka süchia aoba sülen ambulance ka nung anir aoba mapang nung kari tashiyim amshia la raksatsü.

July 24 nü Bodh Gaya nung Home Guards shimtsü atema asemtepba mapang nung tetsürlaji süchia ao aser ambulance nung anir toudak mapang nung la tashiyim amshia raksatsü.

Lai ashiba kuli nung ajemdaker Bodh Gaya police station nung ken o ka benokogo.

SP Ramanand Kumar Kaushal-i, "Ambulance nungji driver aser technician ka nati la tashiyim amshia raksatsü, ta lai tai tongloktsüogo. Onoki la medical test agiba sülen tai tonglokja alir anapronglaji pua asüngdangaogo," ta metetdaksü.

Paisa, "Tenati telangzüba

agütsüba jagi onok melung masür. Doctor temia la tashiyim amshia raksatsübaji jangjatsüogo," ta metetdaksü.

Iba tatalokba dak sendakba nung Union Minister aser LJP (Ramvilas) tongti lenir, Chirag Paswan-i, "Ozüng alema inyakba mapatem menokdangtetba sorkar ka (Bihar sorkar) ni pusemba atema ni jashia bilemer," ta ashi.

Paswan-i, "Atangji iba tatalokba ya aitsütsü tetemsü, ajisüaka tasüngdangbaji ya lir-kechiba item ama tatalokbatem kanga bulua ataloker? Ozüng alema inyakba mapatem maneni ataloker. Yamai dang ora tetsübutsüka asütsü," ta ashi.

"Election atongtsü mapang anasa karibo sorkar tenüng menüktsütsü atema maongka agitsü, ajisüaka ozüng benoka tensa azüoktsüji sorkar teinyaktsü mapa lir," ta paisa shisem.

इंडियन बैंक Indian Bank ALLAHABAD		Zonal Office : Dibrugarh T.R. Phukan Road, Chiring Chapori, P.O.: Dibrugarh- 786001 E-mail: zodibrugarh@indianbank.co.in		KIOJEN AYOKTSÜ SANGDONG		APPENDIX- IV-A [SEE PROVISIO TO RULE 8 (6)] KIOJEN AYOKTSÜ SANGDONG Securitisation and Reconstruction of Financial Assets & Enforcement of Security Interest Act, 2002 aser Security Interest (Enforcement) Rules, 2002 nung Rule 8 (6), 6 (2) & 9 (1) kübok kiojen ayoktsü atema E-Auction Sale Notice.	
Public aser talisa sen apur (tem) aser Guarantor (tem) dang ya sangdonger, Secured Creditor dang mortgaged/charged süa aliba tsünglanglen shia aliba kiojen ya Indian Bank nung Authorized Officer-i agiadokogo aser iba kiojen ya 10.09.2025 anogo nung "Kong koma ali", "Koma lidir yamaji" aser "Yangji aliba ajak" basis nung ayoktsü. E-auction ajanga ayoktsü aliba kiojen indang osang tejangja tsünglanglen metetdaksür:							
Branch		A) Name ef the Borrower/Guarantor/Mortgagor B) Due Amount		a) Details of the Immovable Property b) Property ID No.		a) Reserve Price b) EMD c) Bid Increment Amount d) Any Encumbrances on property	
Mokokchung		A) Sen apur aser Mortgagor- Sri Bokato Nikhevi Chishi, S/o Nikhevi, Address: North Point Colony, Zunheboto, Nagaland-798620 B) 17.01.2024 anogo tashi nung Rs. 17,65,596/- (Rupees Seventeen Lakh Sixty Five Thousand Five Hundred and Ninety Six Only) iba denji further interest, costs, tanga charges aser teindokba balala.		a) Village North Point Colony, Zunheboto, Nagaland- 798620 nung Registered Sale Deed No. 320 anogo 26.10.2015 nung Patta/Permit No. 1687 of Dag/Plot No. 43(A) (P.T. No. 4) kübok Sri Bokato Nikhevi Chishi, S/o Nikhevi tenüng nung aliba ali tasazük 630 sq metre aser yangji aliba kiojen ajak. Butted & bounded by:- NORTH- Kasheto, SOUTH- Akheho, EAST- Approach Road, WEST- S. Toshili Zhimo. b) IDIB50340259679		a) Rs. 45,00,000/- (Rupees Forty Five Lakh Only) b) Rs. 4,50,000/- (Rupees Four Lakh Fifty Thousand Only) c) Rs. 10,000/- (Rupees Ten Thousand only) d) Not Known any	
e-Auction anogo aser mapang: 10.09.2025 nikongdang 1:00 ako nungi nikongdang 5:00 ako tashi aser mapang shia telatet makai minute 10 atsülangtsü				EMD sen agütsütsü atema tatembangbiba anogo aser mapangji: 10.09.2025 anogo nung nikongdang 05:00 ako tashi.			
Osang tejangjaba atema concern Branch Manager : (A) Mokokchung : 9654482989; (B) Zonal Office Dibrugarh: 9628610699 den tongtepratepang							
Bid asütsüpurtem dang e-auction service provider PSB Alliance Pvt. Ltd. indang website (https://baanknet.com) nung online ajanga shilem agitsü metetdaksür. Technical Assistance atema 8291220220 nung call süang. Registration status aser EMD status atema support. baanknet@psballiance.com dangi mail süang.							
Kiojen osang tejangja den kiojen noksa aser auction atema telatetbatemji https://baanknet.com nung reprangtsü akok aser iba portal dak sendakba nung metetpelatsü atema PSB Alliance Pvt. Ltd. den Contact No. 8291220220 ajanga tongtepratepang.							
Bid asütsüpurtem dang https://baanknet.com . website nung kiojen reprangba mapang nung tekalen shia aliba Property ID Number amshitsü metetdaksür.							
Date: 22.07.2025, Place: Mokokchung				Authorised Officer (Indian Bank)			



TIR YIMYIM YIMOBILEM (EDITORIAL)

DIMAPUR

AMUNGNÜ

CHITENI 27, 2025

Ochiba Iartem

Alima nung asenok meimchirtem ya asenoksasa asenok sünütsüsüa alitsü makoker, kechiyong asenok madak ain tashi aketba kibur ana lir. Kibur kaji, asen yanglusang Yihovah Tsüngrem aser tangabaji kibur masü ser nung asenok madak kibur kuma alitsü merangba Satan, asenok külaoktsüsang lir. Anungji, asenok alima nung ali tashi kibur ana rongnung ya ka mesüra ka tenzüksü. Iba jagiang, Yisua asenok dang Mathi 6:24 nung, nisung shingaia kibur ana metenzükettsü ta ashiba angur. Aji oda, kibur ana rongnungji shiba tenzüknor, tetezü shiba lar mesüra shiba kilir süner, aji asenok mulung, asenoki shimtsü. Iba kasa tangatetba nung, Yihusua-ia Israel nungertem dang, nenoki Yihovah Tsüngrem tenzüksü asü mesüra tanga tsüngrem tenzüksü, aji nenok mulung, nenoki shimtetang saka "ni aser ozü kibongbo Yihovah Tsüngrem Kibubasa tenzüksü," ta ashiba asenoki Yihusua 24:15 nung shia aliba angur. Kodang asenoki Yisu Khrista asenok menen asoshi asü ta memeteti liasü, asenok Satan, temenen, lar liasü, anungji asenok mulungjang nung tajung inyaksü bilemaka meinyaktet. Iba mapang asenoki asenoksasa asen shi azü aser tebang temeli azüoka linür saka mazüoktetter ta asen taküm agi asensasa asen nümamedangteti lia aru, kechiaser asen taküm nung asen mulung masü saka Satan kibursang mulung liasü. Ibaji angatettsü atema, asenok dang tenyar Paul-i Rom 7 nung ni' kechi meinyakner aser aser ni' kechi sempar, itemji dang ni' inyaker alir, kechiyong aji kü dak aliba temenen satani inyaker ta shia angur. Asenokia asen taküm nung tajung inyakner saka ma ta tamajung inyaker alir ta asüba ya süngmanga bilema alitsü. Alima nung, shitakba shidi süra, shibaibo tamajung inyakner, saka tajung dangbo tamajung tuluba inyaker alir aser tajung inyakertem dangbo tamajung inyaker kanga agia teimba angur. Ibaji asensasa inyaker masü saka asen taküm nung kiburi inyaker. Aji oda, asen taküm nung temenen Satan kibur südaksü tashi pai mulungba ama tamajung aser temenen mapa dang inyaksü. Ajisüaka, Yisu Khristai asenok temenen nung alar süa aliba tesamatsüba tia nungi kümzüksü asoshi Pa taküm bendanga agütsüba ajanga, Tsüngremi asenok temenen Satan kübok alar süa aliba tia nungi salatsü aser nüchi kümtsü, anungji asenok tangbo temenen lar masü saka Khrista nung taküm tasen kümogo ta Rom tapu 6 nung shia angur. Ajisüaka, Satan kübok alar liasüba tia nungi nüchi akümji, joko, tangbo asen inyaknüsü inyaksü ta masü saka asenok alarbo alarsa mesüra kilirbo kilirsa asütsü. Tetezü, Satan kübok alar süa liasüba nungi Tsüngremi taochi agi asenok salatsübaji kibur melenba mapa ka dang lir, anungji joko tangbo asen taküm nung Kibur aser Kümtekdakbaji Yisu Khrista asütsü. Iba jagiang, temenen satan talenba nungi salaba ajanga asenok ochiba lar akümer ta Rom 6:18 nung shia angur. Anungji, joko asenok taküm nung kechi shitak aser kechi ochi (righteous), item ochi mapatemji dang inyaksü. Aji oda, temenen talenba nungi salarji, joko asen inyaknüsü inyaksü ta masü saka asenji asensasa Ochiba lar kümer ochimashi mapa meinyaksü. Joko, tangbo asenoki tangar ajaki majung aser ochimashi mapa inyakba ngur inyaknüa bilemyonga meinyaksü, tangar shi azü jangrabalen jangratema senzüya ngur asena senzünüa bilemyonga mesenzütsü, tangar pei chinütsü aser pei jemnüsü chiajema jangratema aliba ngur, asena parnok amaji linüyonga malitsü, tangari asenok mezüngmeshiba marem asenokia mezüngmeshia inyaknüyonga meinyaksü, kechiyong, joko, asen taküm madak asen kibur masü, anungji asenok mulung masü saka Kibur Yisu Khrista mulung lir. Asenok Tsüngremi Pa taochi agi asen temenen aser maksü mapatem nungi nüchi kuma anitetba sülen, asenok taküm aser jakla yimya indangindanga ochishia alitsüba ya asen mulungba masü saka Tsüngremi mulungba, anungji asenoki Pai mulungba inyaksübaji asenok mapa lir. Atangji, asenok temenen nung alidangbo asenoki tajung inyaknüa bilemyonga meinyaktet, azüoka linüyonga melitet, saka tangbo asenok tajung inyaksü bilemba ama tajung tuluka inyaktettsü aser aseni asen taküm meraketa litettsüsa azüoktettsü, kechiyong tangbo asen taküm nung kibur melenogo aser kibur tasenbaji Yisu Khrista lir. Atangji, Ochiba kiburi mulungba ama alitsüba takümji temelaba masü, ibaji alima nung anogo shia raraba tongpang asütsü, item tongpang akoker ajak nem Kiburi sempet yuja lir ta tenyar Paul-isa Timoti dang ashiba asenoki 2 Timoti 4 nung angur. Sempet lira yangji tongpang rara aser tetoktepba ka lir, sempetji angati masü, ibajibo peisasa aazüksü. Iba tongpangji, anogo shia, ochimashiba lima nung ochishia alitsü merangba tongpang rara asütsü, anungji ochimashiba lima nung ochishia litetba purtemi iba sempetji ajangzüksü.

OLEMSABANG

Sorkar aser Arogo "Service Rules" medemdangba (Research findings)

A. M. TOSHI JAMIR (Dimapur)
Retired DIRECTOR (GoN)

(Yashi adok nungi...)

(6) **MEDICAL ALLOWANCE (ita shia):** SORKAR-tenzükertem aser Pensioner-tem ita shia Rs.800 ngua liasüba tangbo Ayushman Bharat Pradhan Mantri Jan Arogya Yojana-Chief Minister Health Insurance Scheme (ABPM-JAY CMHIS) atema 400 katir. Health Insurance Scheme (EP category Rs. 20 lakh/General category Rs. 5 lakh) ya Nagaland nung 14.10.2022 anogo nung Chief Minister-i sangdong (launched asü) aser mapa kuma ao ta zülua angur. AROGO-tem nunga Medical Allowance ji ita shia iba amai agütsüba ajangshia arudagi : (Arogotem lenitsü (awareness) atema ishika sayur) : Rs.1000; 800; 600; 500. Yimtsüng Arogo tulu asüyonga kar nungbo magütsür.Saka ano yimtsüng Arogo tila asüyonga kar nungbo 800 agütsüba angashir.

Note: Talisa yimtsung nung Medical Allowance-ya Arogo nung toklang tenzükertem nem terarabo agutsütsü leman ali asü mali Mungdangtem-i reprangdang nung ajungtsü amaia.

(H) **GRATUITY :** SORKAR office nung toklang tenzükertem mapa nungi anendang iba-ya agütsür (shirnoksa temsüa lir (as per admissibility/eligibility) . AROGO tem aika nung, tenzükertem mapa nungi anendang tenzükbakumji züngdang külen Arogoi lemteta akaba ama Senji agütsür. Arogo kar nungbo Gratuity magütsür saka iba amai inyakba angur:

- (i) ita shia sen Rs.1000 katizüka ayur aser Arogo-i ita shia Rs.1000 enoksemtsür;
- (ii) ita shia basic pay aser Dearness Allowance nungi sen ishika katizüka yutsür aser iba den küsaji Arogo-i enoksemtsür (ano danga lir).

(I) **LIBRARY:** Talisa Arogo tulutemibo iba nungya temulung agütsü nung junger. Kechiba Kakat-nang nungdak ? Yangi Arogo kati Leniba (Guideline) kakat nung yamai zülua aliba agutsür: "AROGO TENZÜKERTEM ASER AMANGBAPURTEM TANELA ASER SHISATSÜ NUNG TAJANGZÜK NGUTETTSÜ ASOSHI AROGO NUNG LIBRARY TAJUNG KA AYUTSÜ. LIBRARY NUNGDAK AJAK DEACON BOARD-i ACHA-AYANGTSÜ". Anungji küm shia, talisa Arogo tulutemibo, Arogo Budget nung, kakat tajung-tem alitsü asoshi sen ayu nung ajungtsü.

(J) **PENSION ANGUTSÜ ASÜ MANGUTSÜ?**

Sorkar mapai 01.01.2010 matongdang ayir-bo Pension tejenba inyakyim kübok angur (koba nung Pension angutsü atema mapa inyaker ita sen nungi ita shia sen KATIZÜKA MAYUR). Saka 01.01.2010 anogo nungi Sorkar mapai ayirtembo , tesülen Pension angutsü atema, ita shia sen terara KATIZÜKA AYUTSÜLA ta Goverement's NOTIFICATION (Sangdong) dt.28-01-2010 nung zülua angur. "THE GOVERNMENT OF NAGALAND IS PLEASED TO ADOPT THE NEW RESTRUCTURED DEFINED CONTRIBUTION PENSION SCHEME OF THE GOVERNMENT OF INDIA IN RESPECT OF ALL NEW ENTRANTS TO THE SERVICE OF THE GOVERNMENT OF NAGALAND WITH EFFECT FROM 1ST JANUARY 2010. A MONTHLY CONTRIBUTION OF 10 PERCENT OF THE BASIC PAY AND DEARNESS ALLOWANCE(INCLUDING DEARNESS PAY)TO BE PAID BY THE EMPLOYEE TOWARDS THE PENSION FUND AND THE STATE GOVERNMENT WOULD ALSO PROVIDE A MATCHING CONTRIBUTION AS EMPLOYER'S SHARE". (ano danga-a densema zülua lir).

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Sunday School tesayur Pam Knowles-i otsü tasen kayanglutetogo



Pam Knowles

July 26, 2025: Merseyside County, England nung Sunday School tesayur kati Arogo nung küm talangtiba Sunday School tesayur inyakba otsü tasen kayanglutetogo.

Pam Knowles-i 1951 küm nungi tenzüka St Anne's Church Aigburth nung Amongnü shia arrshi küm 3-5 tsüngdapur tanurtem dang sayua arur.

Lai iba Arogo nungji küm 73 ser anogo 104 tashi Sunday School tesayur inyakba record ji Guinness World Records-n taküm January ita nung jangjaogo.

La jakdang mapang talangtiba (küm 70) Sunday School tesayur inyaklaji United States nungi liasü, saka Pam

Knowles-i la ajatetogo.

Pam'er jabasoi Guinness World Records nem application agütsüba sülen parnok arua records ji reprangshia liasü.

Tesüiba küm aika Pam Knowles-i St Anne's Arogo nung Khristan shisaliok dak sendakba nung inyaka aruogo. La küm 40 tashi Sunday School Superintendent inyaka liasü aser mapang talangka Parochial Church Council (PCC) nunga züngsem liasü.

St Anne's Arogo nung choir-i mapang shia UK aser Europe tesem balala sema kentena jajaba mapang nunga Pam-i Arogo lenir ka ama choir ji meina ao.

Osangbener den jembidang

lai, "Ni Sunday School tesayur inyak tenzüka mapang den medemdangra tanü-asüing tanurtem yimyayimbong kanga melenshiogo. Parnok kanga samarobo masü. Ni tanurtem meimer aser tanurtem dang otsü ashitsü jangrar," ta ashi.

"Onoki Adam aser Eve otsü nungi tenzüker. Tanurtemi Eden tsüki otsü, Noah'er rong aser Daniel o molusongzü otsütem meimer. Ajioda onoki Tejen Lai nungi tenzüka Tasen Lai nung aliba otsütem ashir. Onoki ken-a atener aser teka mapa balala inyaker. Parnoki rong ateptsü jangrar aser saisapong-a jangrar. Iba sülen onoki Tenla kidangi tua sentong tembanger," ta laisa metetdaksü.

Guinness World Records nungi Pam-i anguba certificate ji St Anne's Arogo nung sayadar. Arogoia la nüngtem nung sentong ka ayongzüka la nem sempet aika agütsü.

Diocese of Liverpool Education Team-ia la nem tetushi agütsüogo.

Diocese-i sangdong ka ajanga, "St Anne's Arogo nung ajaki Pam meimer aser akhümtsübur. Tanü tashi lai Sunday School class methitemi agir aser ibaji ajanga tanurtem kanga ajungmesor. Lai sayutetba tanurtem nungi lenirtem aika adokogo. Lai sayuba nisungtem chirnur aser semchirtem tashi dang lai sayu. Pam ya atangji St Anne's Arogo nung tatishitsü tajung aketba lenir ka lir," ta metetdaksü.

Hulk Hogan ita 18 tejaklen ang baptia liasü



2023 küm December ita nung Hulk Hogan baptiba sülen tangokba noksa nung angur.

July 26, 2025: Wrestling asayar mongin, Hulk Hogan arrshi küm 71 nung alima nungi pilaogo; taoba mapang WWE champion, Hulk Hogan-i ita 18 tejaklen ang tzü nung baptia liasü.

Hogan ya Terry Bollea nung aso aser 1980s mapang nung kanga nüngtugu aküm. Pa ya trokben tashi WWE (World Wrestling Entertainment) champion liasü.

2023 küm December ita nung Hulk Hogan aser pa kinüngtsü, Sky Daily Hogan na Florida nung aliba Indian

Rocks Baptist Church nung baptia liasü. Iba mapang nungji pai, "Yisu nem kü taküm bendanga agütsüba ya kü taküm nung anogo tajungtiba lir. Shisabulu mali, tesempa mali aser taitüsüba mali.... temeim dang," ta metetdakja liasü.

Hogan-i X ajanga, "Ni arrshi küm 14 asüandang ni Khristaji kü Kümtetdakba ta agizüka liasü. Training agiba, sarasademba aser vitamin achiba agi ni saisapong asayateta liasü. Ajisüaka tangbo ni Tsüngrem den alir.

Bendanga agütsüba, tenzüka aser temeimji tongtibangba. Kü Kibuba aser Kümtetdakba tashi ajanga ajak akoktsü," ta metetdakja liasü.

Pa baptiba sülen nungi pai mapang shia social media ajanga Lai tekong balala lemsatep aser pa tamang jenjang lemsatepa aruogo.

2009 küm interview ka nung jembidang Hogan-i, "Ni kü yimsü dak metaloker. Ni Khristaji kü Kümzüksang ta agizük, pa Kangki nung asü aser kü menen alangzük," ta pai metetdakja liasü.

ANOGO ABEN TSÜNGREM DEN

Shibai Parnok Idakji Yutsü ?
T.Ken 75:1-10

Kodang nüburtemi peisasa temaba atur aser mezüngbuba asütsü meranger, tekong 7 ji azüngtsü junger: "Saka Tsüngremji o bendanger. Pai ka ludaktsür, ka tudaktsür." Iba yagi asenok asükümba arütsür. Nüburtem kechi jenjang nung lir parnok idakji alitsü shibai mela? Tsüngremi Yohan Baptitsübai ashi, "Kotak nungi nisung nem kechi agütsür iba dak alema, pai kecha angutsü makok" (Yn. 3:27). Peteri zülü, "Anungji mapang tetemsü nung nenok uludaktsütsü asoshi, nenoki nenok sasa tashi taitba teka kübok ajemalua kümang" (1Peter 5:6). Shibai tanishirtemi temaba jenjang nung ulutsür? Tsüngremi. Shibai temeaba menden nungi teküpbokbai uludaktsür? Tsüngremi. Ibai inyaktsü shiba shisa aka? Tsüngrem. Pa kechi jenjang nung lir aji Tsüngremi pa idakji nüngdaker ta shingai mebilemtsüla.

Asenok kong lir idakji lir, kechiaser Tsüngremi asenok idakji yutsü ta asenoki angatetdi. Tekong 7 jagi asenok asükümba dang arutsür masü- iba yagi aremzütsü ajungshir. Yosef taküm bilemdangang, pa tsükchirtem ludaktsütsü aser pa kechi nung alitsü tim ataa ali. Mosa aser Nehemiah indang bilemdangang. Asenok taremzüc koda nüngdak! Ken ken Tsüngremi pa nübur taochi makaba yimsüsür kübok yutsür. Asenoki mulungba raksatsü asoshi Tejen Lai nung ama, Tsüngremi mapang tamajung ajanga odaktsür aser asenok tali pa mesüka kümdaktsür.

Tasembuba, iba yagi asenok taküm nung shisa bulu pungpadaktsür. Na tanishir menden nung lir asü? Tsüngremi na idakji yutsü. Tsüngremi na idakji yutsü nungji Pai mulungba tashi na idakji alitsü. Pai shimtetba leman nung Tsüngremi na amshitsü. Asüküm masütsü kümdangang. Kodang asenoki asükümdir aser mezümekümdir, Tsüngremi ashir, "Ibai na alutsü mapang lir." Saka asenoki asen tila kümra, Tsüngremi ulutsütsü. Pa tekai asenok ajungkettsü. "Tsüngremi asükümer nokdanger, saka ajemalur nem taochi agütsür" (1 Peter 5:5).

Tanishir tajung kübok na mapa inyakdak mesüra arogo nung timtema alir asü? Tangari telemtetba tamajung agiba agi parnok idakji yutsü asü? Ne khuret ajak Tsüngrem dangi bener arung aser itemji lemsatepang. Maneni aotsü Pa dang tashi asüngdangang aser Pai obendangtsü ta bilemtettang.

Uganda nung Muslim nungertemi Khristan yimsü dangi meyiper ka tepset

July 26, 2025: July 18, 2025 shisatsü aser 'Allahu Akbar' ta nü Uganda nung Muslim ayimdena Maliki dak azük. nungertemi arrshi küm 37 Kobi melii kübu, Kalimu den Khristan ka tepsetogo; Islam tangartem kotari amer aruba yimsü toktsür Khristan yimsü sülen Maliki teku nung kotariji agizükba agi kibong setdoktsü," ta laisa züngsemtemi pa tepset. metetdaksü.

July 18 nü Muslim "Kiyongertem adenshi saka nungertemi par ki mita aoba pa mekümzüktet. Onoki pa mapang nung pai Yisu tenüng anasa aliba clinic kati anir tetshia sarasadema liasü. aodang len tom nung süadok," ta laisa metetdaksü.

Kaliro district kübok Kaliro Taküm April 9 nungi April 12 yimdak Kasajja Abdul Maliki-i tashi Kaliro jila nung evangelistic Muslim nunger Hokolbarnü sentong ka nung Maliki-i sarasadem sentong nung medeni par ki shibanger Khristan yimsü agizüka liasü. sarasadema Lai zünga liasü.

Pastor kati, "Iba sentong sarasadema Lai zünga liasü. Taküm April ita nung pai tembangba sülen ni pa ozü Khristan yimsü agizükba sülen kidangi anir ao aser hopta ka nungi pai Lai zünga shi pa den Khristan sarasadema aruogo. tesayubatem lemsatepa liasü, Osangbener den jembidang ibi sülen pa kidangi meyipa par kinünger Shamina-i, ao," ta metetdaksü. "Hokolbarnü Maliki-i Yisu Iba mapang nungjagi tenüng tetshia sarasademba ni tenzüka Maliki-i ita shia angashiba sülen ni kibong Hokolbar ana Bible study nung züngsemtem nem iba osangji aden aser ita nung khen Arogoi metetdaksü. Iba sülen ayongzüka training sessions kinüngertem arua ki kakkoker nung aden. atudang Maliki maneni "Arogo ka ama onoki Kaliro sarasadema liasü aser pa jila nung pa atema business anasa Laishiba ka liasü," ta tilateri ka tenzüksütsü sentong metetdaksü. ta pastor-isa "Kinüngertemi Laishibaji metetdaksü.

AO OSHI ANGAZÜKDAK: TANÜ ANGAZÜKTSÜBA OJANG



Tir Yimyim


Terü

- (n) len tezülen (wayside)
* Terü nunga anakawa meindoktsüla.

Terü

- (n) shiruru jajaba lenmang (animal's path)
* Shiruru jajaba terü nokdanga meyutsütsüla.

OLONG PAITEP # 7220



TIPLÉN

1. Süngmang - 6
3. Tajü kümdaktsü - 3
5. Jangnem agizükba oset - 3
6. Telok tulu - 5
8. Chiok - 4
10. Tilateri - 7
13. Renloka ao - 4
14. Atem - 5
16. Mapang matong - 3
17. Mebilemtet - 3
18. Nisung aika senzü - 6

LANGTSÜNGLEN

1. Khu aben - 6
2. Arang - 3
4. Yimya yimko - 5
7. _ _ _ _ tep - 5
8. Ku ongtok - 5
9. Mesüktep - 3
11. Mesak/rürü - 6
12. Mapa Atem - 5
15. Sentilong - 3

OLONG PAITEP # 7219 TELANGZÜBA


TIPLÉN :

2. Tesasa, 5. Sen, 6. Warok, 7. Kaset,
8. Temin, 11. Süjak, 13. Talak,
14. Sadok, 15. Ola, 16. Amajak.

LANGTSÜNGLEN :

1. Suwar, 2. Teroto, 3. Satan,
4. Jenti, 7. Kinük, 9. Okadak,
10. Atala, 11. Salem, 12. Saket.

NAI-A YA METETTER MA



Laishiba indang temetettsü kar:

1. Laishiba ya küm 500 agia zülü
2. Laishiba ya Hebrew, Aramaic, aser Greek ta oshi asem nung zülü
3. Laishiba ya Asia, Africa aser Europe ta continent asem nung zülü
5. Laishiba nung tapu aser tekong ya 1200s CE nung bendenlok
6. Laishiba nung tapu talangtibaji Yeremia lir aser tapu tatsütibaji 3Yohan lir
7. Laishiba nung ken 185 lir
8. Laishiba nung pungmang 21 mangaoka lir
9. Laishiba ya nisung 40 dak temai zülü
10. Laishiba ya mezüng English oshi nung John Wycliffe-i 1382 A.D. nung meyipzüka liasü

Meghalaya MP-i state nung ILP benoktsü mepeshi



Shillong, Chiteni/July 26

(Agencies): Assam nung ozüing alema alir mintokba ya Meghalaya-i senoka aittsü akok ta shisabulua bilemba mapang ka nung Meghalaya MP kati Union Home Ministry dang state nung Inner Line Permit (ILP) system benoktsü mepeshia metetdaksüogo.

ILP benoktsü atema Meghalaya nungertemi mapang talangka nungi khanga arudar.

Union Home Minister Amit Shah den senden amenba mapang Voice of the People Party (VPP) nung MP Ricky Syngkon-i, Meghalaya nung bendangertemi lisopurtem amokbangtsü ana nung aliba indang süoki ia bilemba lemsatop.

Pai, arrtsü nung aser talisa Bangladesh den international

arrtsü aser Assam den interstate arrtsü nung temelaba maka ali atsünger aliba tali küma aoba indang metetdakja liasü.

"Tenokdangba maka bendangertem senoka aitba ya Meghalaya nung tribal tem sobaliba maitsü, ali temeden aser socio-economic security atema amokmeren ka lir," ta Syngkon-i ashiba den Centre dang jenjang tapet agitsü mepeshi.

Paisa, kidanger state Arunachal Pradesh, Mizoram, Manipur, aser Nagaland nungbo ILP benokogo, koba ajanga non-local tem state-i aitba aziüoker aser lisopurtem temeden kümzüka toktsür, ta ashi.

Assam nung ozüing alema amenoker alitem aser kuli kakat shitak maliba immigrant tem aninba mapang Meghalaya nung

ILP benoktsü atema takhangba tali kümdar.

MP-i, Assam nungi aninertem ya Meghalaya-i senoka aitsü tsüba bilemba lemsatopogo. "ILP benokba ajanga nüburtem tejangraba ataloktsütsü aser Sixth Schedule kübok constitution-i tekümzüka agütsüba dak tali tamang akatsü," ta Syngkon-i shisem.

Meghalaya nung ILP atema akhangba ya tang tasen masü. Meghalaya Legislative Assembly-i, 2019 küm December ita bangzüng ka agizükogo aser Centre dang state nung ILP inyakyim benoktsü takhangba agütsüogo. Iba sülen jenjang aiben agiaka iba ken o ya Ministry of Home Affairs ket nung bangdaker lir.

Manipur police-i temesepba mozü shibelener ana apu

Imphal, Chiteni/July 26

(Agencies): Central security force temi teyari agüja Manipur Police-i, temesepba mozü shibelener ana apu, aser tanga meita aoba sentong ka benoka inyakba mapang Churachandpur district nung prangbong injang aser tanga hadir kar ngutetogo, ta police-i Honibarnü metetdaksü.

Itangitertem nungi osang tejangja angazükba sülen sepaitemi Churachandpur kübok Behiang Bus Parking meita aoba mapang Tonzang yimtsüng nung alir Hausuanlal Phiamphu

(53) apu. Pa ket nungi brown sugar gram 168 nguteta liasü.

Pai kuli agütsüba dak ajemdaker kasa team yagi ano Thongkhului nungi Lamminlal Haokip (33) Khenjang yimtsüng nung pua liasü. Iba nisungba ana yagi temesepba mozü shibelentsü atema amshiba Honda Activa ka Churachandpur nung gari anenba tesem ka nung anener lia ngutetogo. Narcotic Drugs and Psychotropic Substances (Amendment) Act, 2023 kübok tenaprongla anema ken o benokogo.

Tanga meita aoba sentong ka benoka inyakba mapang Churachandpur Police Station kübok Siden yimtsüng nung sepaitemi prangbong injang aser hadirtem aika ngutetogo.

Sepaitemi apuba prangbong injangtem rongnung .22 rifle ka, 9mm carbine ka aser 9mm pistol ka (anaprongla magazine dener), 12-bore rifle ka, bolt-action single-barrel rifle ka, long-range mortar (Pompi) ka, live Pompi bomb asem, Baofeng handsets ana, smoke grenade ka aser iba den injang balala densema liasü.

Senotsü mashiyimi amshiba atema opposition-i Mizoram sorkar aitsü

Aizawl, Chiteni/July 26

(Agencies): Mizoram nung terenlok maparen balala atema Centre sorkari senotsü lemmzütsüba mashiyimi amshiba atema süoki ia bilemba Mizo National Front (MNF)-i lemsatopogo.

Brehostibarnü DoNER Consultative Committee senden amenba sülen opposition party-i iba titsüba ya benoka liasü.

DoNER Consultative Committee senden nung Northeast nungi Parliament züngsemtem aser ketdangsür tejentemi shilem agi, kong Mizoram nungi Rajya Sabha züngsem aser MNF representative K. Vanlalvena-ia shilem agia liasü. Senden nung Serchhip district nung Keitum-

N Mualcheng-Zawlsei lenmang yanglushitsü atema senotsü lemmzütsüba mamshiba metetdakja liasü,

Iba mapa atema 2023-2024 budget nung Ministry of DoNER-i sen crore 200 shi sanction süja liasü. Project inyaktsü agizükaka lenmang yanglushi metenzüki lir asünung Vanlalvena-i ashiba agi, sen ya state sorkari tanga mapa atema amshi asütsü akok.

Committee-isa, iba ken o ta taruba senden nung bushisüngdangtsü telemtetba agia liasü.

Maneni iba den bendenloksema ketdangsürtemi Mizoram sorkari Directorate of Fisheries and Animal Husbandry kübok SNA

SPARSH Scheme atema 2025 küm April ita Centre sorkari sen lakh 1,000 sanction sütsüba mamshi. Senotsü lemmzütsüba mamshiba ajanga tarutsü nung ano state atema sen lakh 700 sanction sütsütsü aliba dak kongshitsü akok.

Iba dak sendakba nung MNF-i Hokolbarnü, 2025 küm April ita sanction asüba fund tem indang osang tejangja agütsütsü ayongzükgogo aser ashiba agi sorkari senotsü intokba ya odangtetsüla aser jangja jangja sayutsüla.

Party-isa Centre dang, Mizoram nung aliba nüburtem ajangzükdaktsütsü atema item tongtibang fund tem ya shitak amshidaktsütsü asoshi jenjang agitsü mepeshia liasü.

Vietnam nung bus ka tsükok, nisung ter asü

Hanoi, Chiteni/July 26 (Agencies): Vietnam linük tiyonglen tour bus ka tsükokba nung tanur ana densema passenger ter asü, kong taoba hopta tatemlen Ha Long Bay tourist site nung rong ka tzü telungi lua nisung ter dak tema süa liasü.

Iba amfang nung jajaba bus ya linük yimtiba Hanoi nungi Da Nang yimti leni aoba national highway nung aoba mapang Hokulbar aonung Ha Tinh province nung lenfang tezüleni oa lenfang tezülen markers aliba nung tsüker makep, ta ketdangsür temi sangdong ka nung ashi.

Iba lendong nung tanur ana dena nisung ter asü, aser parnok ajak Vietnam nung lir. Kasa lendong nung ano nisung 12 yirua mozüki bushia bener ao.

Asürtem rongnung par pongu domestic tourists liasü aser parnok ya Da Nang-i südoksünema amungi aor liasü, ta state media ajanga ashi.

Da Nang ya taoba mapang French colonial port city ka liasü, koba South China Sea tsütsü tejak shia lir aser domestic aser international tourist asoshi kanga nungtugu tesem ka kumogo.

Iba lendong nung asür aser kanga sashia yirur ya aika bus tejaklen sleeper bunks nung liasü. Kanga sashia atsükba nungi asü ta takum jenbur temi ashi.

Vietnam Ato Kilonser Pham Minh Chinh-i iba lendong bus h i s ü n g d a n g t s ü ayongzükogo.

Vietnam nung traffic lendong ya teti ajurur, kong taküm küm tenzüker tang tashinung gari lendong nung nisung 5,024 süogo, koba 2024 küm kasa mapang nisung 5,343 süa liasü, ta sorkar indang National Statistics Office ajanga ashir.

Vietnam north tsütsü UNESCO-recognised Ha Long Bay nung tourist boat ka makepoka Vietnam nung tourists aser rong ketdangsür 38 sür hopta ka lir iba lendong ya ajurur.

Iba rong lendong nung samaba passenger ka tang tashi bushiba mapang lir. Iba rong lendong nung nisung ter dang takum kumzük, koba linük nung rong lendong tesashitiba liasü.

PELABA LEMSATEPER

18/05/1974



12/07/2025

“Kechiaser ni asoshi taküm alibaji Khrista, aser tasütsüji tajangzük lir” - Filipi 1:21

Onoki teti kanga meima aliba, asür Imkongnuksung (Mongsenyimti) Pa shiranga aliba mapang nungi tasünü tashi shirnokisa nübu, mapang, rongsen, shisatsü aser sarasadem ajanga ozü den yaritepogo, nenok ajak tang kanga-sa pelar ni ta iba sapang ajanga lemsateper. Nenoki meima yariba ozü-i kecha meyipa magütsüteter, saka tulusang Tsüngremi nenok kija, kibong, medemer, kiyonger, lokti aser Arogo tali moajangma ta ozü tamang sarasadem.

~ Temeim Kinungtsü, Chimurtem, Tsürapur aser Kinunger adianutem.

Thailand-Cambodia arütsülen rara nung nisung 33 süogo



Phnom Penh, Chiteni/July 26 (Agencies): Thailand aser Cambodia tsüngta Honibarnü agi asemnü buba maneni rarar aser iba rara nung nisung asüba 33 kumogo. Cambodia-i condition kecha makai ceasefire alitsü mulunga lir ta ashir.

Linük ana tsüngta arütsülen mangatettep ya küm aika nungi liasü, saka jets, artilleru, tanks aser ground troops dena raraba bo Brehostibarnü tenzük, aser iba yong United Nations Security Council ajungben senden ka Hokulbarnü amen.

Raraba mechi Thailand aser Cambodia anasa airspace shibangogo ta osangtem ajanga ashir.

Cambodia indang defence ministry ajanga tang tashinung nisung 13 tepsetogo ta ashir aser yangji civilian ti aser sepaipongu lir. Tang tashinung nisung 71 yiruba lir ta ashir.

Thailand nung Hokulbarnü sepaipongu tepset, anungji par tsütsü asür nisung 20 jungogo, kong civilian 14 aser mitkar trokalitsü.

Linük ana tsüngta rara tenzüker nisung asüba 30 ajunger, anungji tesüsa 2008 aser 2011 tsüngta tesashiba raradang nisung 28 tepsetba dang timba akumer.

alitsü ayongzüker aser ano tajunglen nungi tangatettep arutsü ayongzüker," ta pai osangbener dang ashi.

Honibarnü Thai Foreign Minister Maris Sangiampongsa-i, ceasefire aginüra mesüra jembishinü tenzüknera Cambodia-i iba rara shidakba nung tembangnüba sayutsü nungdaker, ta ashi.

"Ni Cambodia dang Thai sovereignty nung aibelenba anentsü aser jembishinü iba ken o angatetteptsü ayongzüker," ta Maris-i osangbener dang ashi.

Hokulbarnü UNSC senden amentsü lia Thai Foreign Ministry odongtar Nikordej Balankura-i Malaysia teyari nung jembishinütsü Bangkok renema lir ta ashi.

Iba rara tenzükba atema linük kati ka tenüng asener. Cambodia-i mozüki ka aser petrol station ka nung rocket kati amakba densema civilian aliba tesemtem amak ta Thailand-i ashir.

Kasa mapang Cambodia-i ashiba agi, Thai sepaitemi cluster bomb tem amshir, koba civilian asoshi lendong aliba mechi linük aika nung nokdanga lir.

Linük ana tsüngta mapang talangka nungi arütsü mechi mangatettepa aruba nung tang rara ya tesashiba alitsü.

Linük ana tsüngta ya arütsü kilometre 800 lir aser yangji tesem kar linük anaprongi par meyong ama kibur akumer.

2008 aser 2011 tsüngta rara adokba nung nisung 28 tepset aser meyerijang aika pei ki yutsür ainshitsüsa akum.

UN court-i 2013 küm obendang agütsüba ajanga küm ter dak tema tensa azüoka liasü, saka May ita Cambodia sepaika tepsetba sülen tensa tamajungba akum.

India den jembitsü mulunga lir: Pakistan Foreign Minister



Islamabad, Chiteni/July 26 (Agencies): India nem olive kongsang agütsür ama, Pakistan indang deputy prime minister aser foreign minister Ishaq Dar-i, shishilembaba aser rongsenketzüng tesendaktep nungi kiralongra anema nokdakba dena jembishinütsü asoshi Islamabad mulunga lir, ta ashi.

Ajisüaka tangbo item ajak India dak keta lir, aser New Delhi nungi telangzüba agütsüba tang tashi Pakistan-i ataa lir, ta Dar-i ashi.

"Shishilempaba nungi counter-terrorism tashi, lenla ajak nung India den inyaksü aser amalitep akatsü Pakistan renema lir," ta Dar-i Atlantic Council think tank den sensaksemba mapang ashi.

Kashmir, security, people-to-people exchanges aser rongsenketzüng tesendaktep densema linük ana tebilemba lemsateptsü tamale amshia aliba framework, jembishinü maneni akatsü nungdakba pai nenshia ashi.

Baisaran Valley nung tai maket tourist 26 tepsetba sülen India-i Operation Sindoor ajanga Pakistan nung kiralongrar tesep toku maker mapang talangka melie Dar-i iba o ya ashi.

Dar, shibai linük tesendaktep, rongsenketzüng tsütsü amalitep akatsü, regional stability, counterterrorism aser alima nung yimjung indang jembishinütsü asoshi Washington nung United States Secretary of State Marco Rubio ajuru, pai India aser Pakistan tsüngta rara tesashiba mekumdaktsütsü asoshi US Tir Donald Trump aser Rubio nati shilem tajung agiba asoshi pelaba lemsatepa liasü.

Ceasefire nung third-party shilem kecha melie India aser Pakistan mitkar lenirtem tsüngta angatettep ta India nokdaka aliba mapang Dar-i iba sangdong ya agütsü.

Kiralongraba tsütsü foreign minister ya United States-i The Resistance Front (TRF) ya Foreign Terrorist Organisation (FTO) aser Specially Designated Global Terrorist (SDGT) ta tenüng agütsütsü telemtetba agiba nungi pilar amai liasü.

Hokulbarnü Washington, DC nung sentong ka nung, US-i FTO aser SDGT nung TRF züngoksemba atema Pakistan "issue" kecha mali, ta Dar-i ashi.

Ajisüaka Lashkar-e-Taiba den TRF sendakteptsüba yabo tai, ta pai nenshia ashi.

The Resistance Front ya Pakistan nung amenoka aliba Lashkar-e-Taiba (LeT) nung kongsang ka lir ta India aser US-i ashi, shirnoki April 22 nü Pahalgam lendong tenüng agia lir.

Pirlo United FC coach kumogo

Chiteni/July 26, 2025 (Agencies): Taoba mapang Italy nung nungtugu asayar Andrea Pirlo, Dubai nung amendaker aliba club United FC indang manager kumogo.

Iba club ya arishi kum 46 tain coach atema kum pongu tsungda club pezububa asutsu, koba 2020 kum Juventus nungi tenzuka liasu.

Turin nung Maurizio Sarri melenzuka sülen Pirlo-i Coppa Italia aser Italian Super Cup akok, saka parnok Serie A nung pezububa nung tembangba sülen Juvi-i pa mapa nungi anenja liasu.

Iba sülen pa Turkey nung oa Fatih Karagumruk nung kum ka majung inyak aser Sampdoria nung ita 14 inyaka

liasu. Pai iba club 2024 kum August ita toktsu.

United FC dang ya Dubai United ta-a ajar aser parnok United Arab Emirates nung Pro-League kubok second tier nung asayar.

Osang ajanga ashiba agi, Pirlo-i club den kum ana atema tenangzüktepba yangluogo.

"Pirlo-i tajangshiba aika bener arutsu," ta club sangdong ka ajanga metetdaksu.

"Pa aruba ya United FC atema tapak tasen ka lapokba asutsu aser iba ajanga UAE football landscape nung club tejangraba tali renloka aoba sayur," ta club-isa kasa sangdong ajanga metetdaksu.

BADMINTON ASIA JUNIOR CHAMPIONSHIPS

Vennala, Tanvi Sharma nati bronze angu

Chiteni/July 26, 2025 (Agencies): India nung badminton asayar Vennala Kalagotala-i Badminton Asia Junior Championships nung Honibarnu bronze medal ka nguogo. Lai semifinal nung Liu Si Ya 15-21, 18-21 agi mekoki liasu.

Tetsur kija asaya nungsa Tanvi Sharma-ia bronze medal ka ngua liasu. Lai semifinal nung Yin Yi Qing 12-21, 14-21 agi mekoki liasu.

Kalagotala aser Sharma na ya iba tetushi asayamung nung India tsurtem rongnungi



Olympic medallist PV Sindhu sülen medal angur tanabuba aser tasembula kumogo. Sindhu-i 2012 kum iba asayamung final nung Nozomi Okuhara koka gold medal ngua liasu.

Asian Junior Championships nung India nung asayartem kum 25buba asaya arur aser tang tashi nung parnoki gold ana, silver ka aser bronze medal trok ngur liasu aser tang Kalagotala aser Sharma nati ano medal ana bendenloktsuogo.

Junior Asian championships nung India nung asayartemi 2002 kum mezungbuba medal ngua liasu. Iba sülen Aparna Balan, Krishna Dekaraja, Aditi Mutatkar, aser Dhanya Nair nung densema tetsur team-i bronze medal ngua liasu. Parnoki semi nung South Korea makok

Iba sülen kum tenet lir 2009 kum Pranav Chopra aser Prajakta Sawant nati tarep temeyoktep asaya nung bronze medal ka angu.

2011 kum Sameer Verma-i tebur kija asaya nung silver angu. Final nung pai Malaysia nung asayar Zulfadli Zulkifli makok. Sindhu-i tetsur kija asaya nung bronze medal angu aser Kidambi Srikanth densema India nung tarep temeyoktep asayari bronze medal ngua liasu.

2012 kum Sindhu-i gold medal angu aser kasa kum Sameer-ia tebur kija asaya nung bronze medal ngua liasu.

2016 kum Lakshya Sen-i tebur kija asaya nung bronze ka ngua liasu, ajisuaka 2018 kumbo pai final nung Thailand nung asayar Kunlavut Vitidsarn koka gold medal angu.

10buba Nagaland Shooting C'ship tembangogo

Dimapur, Chiteni/July 26 (TYO): 10buba Nagaland Shooting Championship 2025, July 22 nungi 26 tashi Aries Sports Complex

Shooting Ranges, Bamumpukhuri-I, Dimapur nung takok ngua asayaogo.

Ajak senteper tebur 38 aser tetsur 16 ta shooter

54-i iba asayamung nung shilem agia liasu.

Category balala nung medal angurtem yamai alitsu:



1. 10m Air Rifle Bench Rest Men Individual:

Gold : Jotham Gurung
Silver : Jamidong Jamir

Bronze : Harshvardhan Sethi

2. 10m Air Rifle Bench Rest Women Individual:

Gold : Mulungnenla Achem
Silver : Bendangyangla Tzudir

3. 10m Air Rifle Sub Youth (NR) Men Individual:

Gold : Ayeka Aye
Silver : Wangshikokba Longkumer

4. 10m Air Rifle Sub Youth (MQS) Women Individual:

Gold : Echenlemla Aier

5. 10m Air Rifle Sub Youth (B) Men Individual:

Gold : Jamidong Jamir

6. 10m Air Rifle Sub Youth (NR) Women Individual:

Gold : Lumrila Jangkhiunger

Silver : Jentiya Walling

Bronze : Kholia Kape

7. 10m Air Rifle Sub Youth (B) Men Individual:

Gold : Imojungba Pongen

Silver : Akumzulu B Imsong

8. 10m Air Rifle Youth (NR) Men Individual:

Gold : Henchoi Noklang

Silver : Konngai Noklang

9. 10m Air Rifle Junior Men Individual:

Gold : Merentsungba

Gold : Kikrukhienuo Belho

11. 10m Air Rifle (NR) Men Individual:

Gold : Kimatsung Jamir

Silver : Medophrezo Sekhose

Bronze : Japuto Y Zhimo

12. 10m Air Rifle (NR) Women Individual:

Gold : Lanusenla Longchar

Silver : Uneinuo Stepheni Solo

13. 10m Air Rifle Senior Master (NR) Women Individual:

Gold : Chizou Sorhienuo

14. 10m Air Rifle (MQS) Men Individual:

Gold : M Tiatemjen Jamir

Silver : Rongsennangshi Longchar

Bronze : Sentilong Longkumer

15. 10m Air Rifle (MQS) Women Individual:

Gold : Yimyakumla

16. 10m Air Pistol Bench Rest Men Individual:

Gold : Jongshilong Aier

17. 10m Air Pistol Sub Youth (NR) Men Individual:

Gold : Zidon Gurung

Silver : Yimtashir Pongen

Bronze : Imnachanger Aier

18. 10m Air Pistol Youth (NR) Women Individual:

Gold : Yuvika Aye

Silver : Kevikieu Suokhrie

19. 10m Air Pistol (NR) Men Individual:

Gold : Kimatsung Jamir

Silver : M Tiatemjen Jamir

Bronze : Medophrezo Sekhose

20. 10m Air Pistol (NR) Women Individual:

Gold : Khrieketounuo Belho

21. 10m Air Pistol (MQS) Men Individual:

Gold : Lanu Rongsenkaba Jamir

Silver : Imnanungsang Tzudir

C. 50M SMALL BORE RIFLE EVENTS:

22. 50m Rifle Prone (NR) Men Individual:

Gold : M Tiatemjen Jamir

Silver : Tovika H Chishi

Bronze : Metekhrielie Mejura

23. 50m Rifle Prone (NR) Women Individual:

Gold : Lanusenla Longchar

24. 50m Rifle Prone (MQS) Men Individual:

Gold : Kimatsung Jamir

25. 50m Rifle Prone (NR) Master Men Individual:

Gold : Lanu Akumtoshi Jamir

26. 50m Rifle Prone Open Sight Men Individual:

Gold : Metekhrielie Mejura

Silver : Vibituo Belho

27. 50m Rifle Prone Open Sight Master Men Individual:

Gold : Lanu Akumtoshi Jamir

Silver : Thepfuhulie Belho

28. 50m Rifle 3 Position (NR) Men Individual:

Gold : M Tiatemjen Jamir

29. 50m Rifle 3 Position (MQS) Men Individual:

Gold : Kimatsung Jamir

30. 50m Rifle 3 Position Master (NR) Master Men Individual:

Gold : Lanu Akumtoshi Jamir

D. 25M SMALL BORE PISTOL EVENTS:

31. 25m Standard Pistol (NR) Men Individual:

Gold : Lanu Rongsenkaba Jamir

Silver : Metekhrielie Mejura

Bronze : Imkongmeren

32. 25m Standard Pistol (NR) Master Men Individual:

Gold : Lanu Rongsenkaba Jamir

Silver : Lanu Akumtoshi Jamir.

Australia nung rongnungi David-i T20 nung century tekaratiba yanglu

Chiteni/July 26, 2025 (Agencies): West Indies den T20I asaya tasembuba asayaba mapang Australia nung rongnungi Tim David T20 International nung century tekaratiba yangluogo. Australia-i iba asaya koka T20 asaya pongu asayatsü aliba nungi parnok 3-0 agi tejakdang kumogo

Asaya nung David-i six 11 aser four trok azuk aser ball 37 nung out mesui run 102 yanglua liasu. Basseterre, Saint Kitts nung Warner Park nung iba asaya ya Australia-i wicket trok agi kokogo.

Toba mapang Josh Inglis-i 2024 kum Scotland den asayaba mapang ball 43 nung century yanglua otsu tasen yanglur liasu.

Australia-i toss akok aser

West Indies tama batting mendaktsu, saka host team yagi asaya kanga junga tenzük. Shai Hope aser Brandon King na senteper over 11.4 nung run 125 yanglua liasu aser captain Hope-i out mesui ball 57 nungi run 102 yanglu.

West Indies team-i maneni over shia run 10 yanglua asaya aser asayar 4 out sür run 214 yanglua liasu.

Tanabuba innings nung Australia batting amenba mapang parnoki asaya junga metenzuktet aser over 5.5 nung asayar 3 out sür parnoki run 61 dang yangluteta liasu, ajisuaka David-i century zuka kanga junga asayaba ajanga team takok dangi ani aser parnoki ball 23 anunga lia asaya akok.

BILEMDANGANG

"Na aolen ajak temeim prokshiang."